



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

#### 47. Kalenderwoche – ab 21. November 2010

## Oba - zum Zweedn!

Nee, isch weeiß nisch, ob isch Ihnen das schon ma erzähld hab... - nee? Sie wissn nisch, dass isch een Enggl hab? Enggel - mid hardn "Güh"! Ja, isch bin Oba! Unsorn Enggl hamm mir ja schon iebor zwee Jahre! Ja, zwee Jahre is unsor Enggl ald. E dährardisch niedlischor un hibschor Enggl... also, das is werglisch e Wundor, bei dähm Oba! Inwieweid Omas fiehr de Vorährbung eene Rolle schbieln dun, weeiß isch nisch genau, abor isch denke, die schbieln da keene Rolle. Enggl komm nach de Obas. Odor, wenn se Gligg ham, ehm ooch nisch!

Genau, dass isch Oba bin, das is ansonsdn eischendlich nisch so schlimm, abor dass isch jedn Ahmd mid eenor Oma ins Bedde schdeischn muss... - nascha! Meine Gudste is ja schon alleweile Oma - das is so! Wobei, de Omas heidzudaache kannsde ja nisch mid die Omas vorgleischn, dies ma gegähm had. Eene Oma in friehore Zeidn, die war ehm rischdisch ald un is rumgeloofn wie eene Oma! Heidzudaache sinn de Omas ofd im besdn Aldor un dun rumloofn wie de Deschdor! Meine Gudste ooch manschma! Isch meene, ma abgesähm vom Umfang... abor was so de Glamoddn bedreffn dud... un de Frissuhr... da dud die gladd mid meinor Dochdor midhaldn!

Meine eischne Oma, zum Beischbiel, die kenn isch bloß so in graue bis schwärzliche Glamoddn un eenor blassblau gebliemldn Scherze. De Schdrimbe warn bliggundurschlassisch grau odor braun. De Haare warn off Dudd gemachd. Un de Brille war werglisch eene rischdische Uhubrille! Daderzu is meine Oma noch von eenor gewissn Heilischkeed gewähnsn. Also, wenn isch ma gefluchd hab, dann isse immor gleisch mid dor Biebl gekomm: Du sollsd nisch fluchn! Un wenn se misch ma ins Bedde gebrachd had, dann mussde isch bähdn - isch bin gleen, mei Härz is reen, soll niemand drinn wohnen, als wie Jesus alleen! Odor so ähnlich. Nee, heidische Omas... ooch was meine Gudste

bedreffn dud... ehor unheilisch! Nascha, aber das dud ehm irschendwie mid dor modernen Zeid  
zusammhäng. Ooch Omas wern am Ende immor äldor un bleim anfangs längor jung. Ooch Obas!

Ährlisch, wenn isch mir nisch bewussd ins Gedäschdnis rufn du, dass isch e Oba bin, dann du isch  
misch manschma fiehln, wie e jungor Schbringinsfeld! Odor wie e Schbringinsbedd! Wobei das  
dann ehm ofd ooch von dor Naduhr berischdischd wern dud. Audomadisch sozusachn. Da duds  
dann in dor Hifde schdeschn odor de Bandscheim im Greize rebellirn.. odor de Galle... - nee, isch  
will ma jedzde nisch alles offzähl, was misch dann manschma an mei eschdes Aldor erinnorn dun  
dud. Aber werglisch... so vom gefiehldn Aldor hähr, da bin isch ofd kee Oba!

Ja, un nu... das wolld isch ja eischendlich erzähl! - ...un nu währ isch nochma Oba! Ja, unsre  
Dochdor grischd noch een Enggl! Een weiblischn Enggl! Es is zwahr noch e baar Monadde Zeid,  
abor de Medezindeschnigg weeiß das schon - eene Enggeliene! E Mähdschn!

Un mir... mir dud ehm jedzde bloß iebrisch bleim, zu hoffen, dass die ooch nisch nach mir komm  
dud! Se soll so ja e niedliches Mähdschn währn, wie dor männliche Enggl! Doi, doi, doi!

**Eduard Sachsenmeyer**